

Premio Den Ambiente Awards a bira premio Padu

Dia 17 di Maart den Cas di Cultura



ORANJESTAD (AAN): Informacion nobo cu DIARIO ta dispone di dje ta indica cu e aña aki, Aruba lo cera conoci cu "Premio Padu".

Manera aña pasa durante e entrega di e prome lustro di "Den Ambiente Awards", e organizador Jan Poets a declara cu esey tabata e ultimo edicion di e premiacion ey. E tempo ey, e declaracion aki a cay manera un bom y mayoria di e premiadonan y invitadonan a expresa palabranan di apoyo na e organizador pa e sigui dal bay cune.

Jan Poets mes a keda hopi sorprende pa e expresionnan di apoyo pa sigui cu e premio y mirando tambe cu nos artistanan falta e reconocimiento como un estimulo di apoyo, Jan Poets a dicidi pa sigui duna nos artistanan nan merecido reconocimiento.

Pero e biaha aki esaki lo bay ta mucho mas mihor y no lo bay ta mas "Den Ambiente

Awards", pero dunando e premio su valor na e maximo personahe farandulero cu ta nada mas y menos Padu Lampe. E premio lo bira oficialmente "PREMIO PADU 1997" y lo ser teni den Cas di Cultura dia 17 di Maart venidero. Ta e intencion pa tur aña e premio aki sigui tuma lugar riba e fecha di 17 di Maart, cual no tin un mihor fecha cu bispo di nos glorioso Dia di Himno y Bandera y cu Padu ta co-autor di nos Himno Nacional.


Pa e ocasion aki lo bay tin algun personahenan di fama mundial presente, pa asina duna e premiacion aki un toke internacional, cual alaves lo sirbi como un promocion pa nos pais turistico. Invitacion a sali caba pa e personahenan aki y no lo bay dura mucho pa nan confirma nan presencia aki na Aruba.

DIARIO a compronde, cu si e personahenan aki confirma

nan presencia, anto esaki lo nifica cu e prome anochi di "Premio Padu" lo bay ta uno historico pa Aruba, pasobra ta trata di personahenan hopi famoso cu sigur lo duna e premio di nos Tata di Cultura den Cas di Cultura conhuntamente cu nos artistanan un valor inmenso.

E biaha aki Jan Poets a delega un persona cu tin tur e cualidadnan pa forma su equipo di huradonan, kendenan lo tin e tarea pa bay evalua y premia e artistanan cu mas a destaca durante aña 1997.

Ta di spera cu "Premio Padu" lo bay haya su merecido apoyo y sosten, pa e por sigui continua tradicionalmente riba e fecha di 17 di Maart. Diasabra awor den e seccion di "Den Ambiente", Jan Poets lo amplia mas y si e personahenan confirma nan presencia, esaki lo ser publica inmediatamente.



Hotel & Casino Porto Paseo
Bo cas na Curaçao
(sobrá ta Hotel)

**Roosje lo contabo mas
 awé merdia den
 "Purba den bo Cushina"**

